

Pelegrinaje: l'Uniun dles porsones vedoes y sores dla Val Badia envieia en **jöbia ai 26 de setember** a n **pelegrinaje a Weissenstein** olá che signor degan Iaco Willeit zelebrará ales 11:45 na santa messa. Le bus peia ia da La Pli ales 7:30. Iade, marena y picia marena costa 50,00 €. Enformaziuns y prenotaziuns dan dai 20 de setember pa Rosa de Scionele ☎ 345 3384551.

Oies - enformaziun: dai 17 de setember ennant sará la santa messa a Oies vigne de, dal dedolönesc ala domegna, ales 16:00.

Oraziun da Taizé: en vendres ai 20 de setember ales 20:00 vegnel tigní tla capela a Oies na oraziun de Taizé. Al se trata de en n'ora olá ch'al ven perié, medité y cianté en forma de Taizé. Düc é der bel enviés a tó pert.

Sorvisc ai Jogn: le SaJ Val Badia lascia alessei che al é endo la poscibilité da gní a se do les fotografies de düc i proiec da d'isté (Isté deboriada, Cool & My summer, Musical, Gardaland by night y Multisport) tal ufize dal SaJ a Picolin. I periun da se tó empara en stik. Por chi co nen n'á nia, él ince la poscibilité da nen cumpré önn te SaJ al cost de 5,00 €. Les fotografies é debann! (orar d'ufize: dal lönesc ala jöbia dales 8:00 ales 12:00).

Zenter Families Mareo: le ZFM envieia les families a tó pert a la Griliada dles Families en domegna ai 15 de setember ete dla pera a Al Plan. La griliada met man les 12:30. An s'encunta les 11:30 dan calogna a Al Plan, spo jarán ete adöm a pe o con la roda. Por scone l'ambiont, s'anse ponsé che vignönn dess se tó empara da ciasa tais, goti y pesteck, nia de plastiga "usa e getta". Chi co ne sciafia nia, ciafará pesteck y goti riciclabli diretamonter ete pa la grilia. I periun bel da s'anunzié anter la sabeda ai 14 de setember pa Marion Ties, ☎ 348 8544553. Le contribut co ven damané a familia por la festa é de 10,00 €.

Comun de Mareo: al ven lascé alessei che l'ater edema él prodü da meter man con i laurs pa la ex Ciasa dal mone (local nò por la Musiga y Jogn). I paurs é der bel periés da lascé jö le lat dan Ciasa dles Uniuns - local Musiga.

Ocio: en domegna ai 29 de setember romagn la strada danter Salaronz y Sares slüta dales 13:00 ales 15:30 stlüta por en pelegrinaje.

I discepolo di Gesù, se vuole crescere nella sua amicizia, non deve lamentarsi e guardare a se stesso. Deve agire e impegnarsi, sicuro che il Signore lo sostiene e lo accompagna.

Papa Francesco, 13.09.2019

Döt le bun a:	Franz Trebo, <i>Desproch</i>	* 17.09.1926
	Maria Candida Trebo Maneschg	* 17.09.1936
	Mateo Ellecosta, <i>Ehrenburg</i>	* 19.09.1931
	Iaco Pedevilla	* 19.09.1936
	y a düc chi co á santennom y compless i agn cöst'edema	

Impressum: Ploania d'La Pli; redaziun Franz Rigo y Edith Willeit
Comunicaziuns cina le **dedemesaledema** sera a Franz Rigo: ☎ 0474 500978 o ✉ ploania@gmx.net
Download plata: www.unitepastorala.org



Plata dla Ploania La Pli de Mareo Santa Maria dal Bun Consei

Ploan: **Signor Klaus Sottsas**
E-mail: ploania@gmx.net

Calogna Al Plan: **0474 501006**
Radio de Ploania: **93,00 MhZ**



Dio á reconzilié con se enstes le monn te Crist y nes á sorandé a nos la parora dla reconziliaziun. Alleluia!

📖 **Es 32, 7–11, 13–14 | 1 Tim 1, 12–17 | Lc 15, 1–32**


Dal Vangelo do San Lúca:

Te chel tomp ¹ea düc i publicans y i piciadús gnüs da Gejú a l'ascuté. ²I farisês y i stüdiés dla lege brunterá porsora y dijea: Al se dá jö con i piciadús y mangia cinamai empara. ³Sön chera ti ál cunté na parabola y á dit: ⁴Sce önn de os á cion biesces y nen perd öna, ne láscel nia spo endò les nonantenö tla stepa y ti va do ala pordüda, cina ch'al ne la ciafa? ⁵Y do ch'al l'á ciafada, la tolel plen de ligreza sön les sciabes, ⁶y canch'al röa a ciasa, cherdel adöm sü compagns y sü ejins y ti dij: Ralegrésse con me; i á endò ciafé mia biescia co ea pordüda. ⁷I ves diji: Avisa ensciö regnarál ince tal ci deplü ligreza por n piciadú su co é dé ota, co por nonantenö iüsc co n'á nia debojügn de dé ota. ⁸O sce na era á diesc drahmes y nen perd öna, ne empeiera nia spo na löm, scoa döta la ciasa y chir zonza lascé do, cina ch'ara ne ciafa la moneda? ⁹Y do ch'ara l'á ciafada, cherdera adöm söes compagnes y söes ejines y dij: Ralegrésse con me; i á endò ciafé la drahma ch'i á pordü. ¹⁰I ves diji: Ensciö regneiel ligreza ince pa i angeli de Dio por n piciadú su, co dá ota.

Oraziun dal de

Periun! Dio, che t'as cherié y che te arvenes dötes les cosses, ciara graziont sön nos: fa ch'i te sorviunse con döt le cör y ch'i podunse sontí l'amur che t'as por nos. Do cösc te periunse por nosc Signur Gejú Crist, to Fi, co é Dio y vir y regneia con te tl'unité dal Spirit Sant por düc i secui dai secui. – Amen.

(Lezionar C)



📖 **Letöres dla 25. domegna ia por l'ann:**
Am 8, 4–7 | 1 Tim 2, 1–8 | Lc 16, 1–13

Edema liturgica dai 15.09. ai 22.09.2019

DOM 15.	24. domegna ia por l'ann <i>memoria dai set dolurs de Maria, Dolores, Ludmilla, Melitta</i>
→ 09:00	Festa de bengnù a signor ploan nò Klaus Sottsas salüde jö dan Soratrú y prozesciun te dlijia, gran messa ciantada en onú dal Spirit Sant y de Santa Maria por döta la ploania ♫ Josef Haydn, "Kleine Orgelsolomesse" oferta por la ploania 10:00 s.m. a Al Plan
Lön 16.	Cornel y Cyprian, Julia, Edith 07:30 s.m. a Al Plan
Ded 17.	Hildegard da Bingen, Robert Bellarmin 07:30 s.m. por † Anastasia Terza, André s.m. por les Püres Armes
Dem 18.	Lambert, Richard 18:00 s.m. a Al Plan
Jöb 19.	Januarius (Gennaro), Igor, Ferdinand 19:30 s.m. por i nüc Tobias Peslalz y Doris Brandlechner s.m. por †† Isidoro y Margherita Mühlmann, Pidra
Ven 20.	Andreas Kim Taegon, Paul Chong Hasang y compagns 07:10 s.m. a Al Plan 16:30 - 18 confesciuns sö Oies
Sab 21.	fešta de San Mateo apostul y evangelist, Debora 07:30 s.m. d'aniversar por † Emilia Kastlunger, Alnei s.m. por † Matthias Ellemunter, Pinter/Sexten
DOM 22.	25. domegna ia por l'ann <i>Maurizius y compagns, Tomesc, Jonas</i> 08:30 gran messa por döta la ploania 10:00 s.m. a Al Plan oferta por i debojügn d'la ploania
<i>ampola:</i>	do intenziun de Florian y Nese Terza, André
<i>ministronc:</i>	▶ da doman y domegna: Daniel y Matteo ▶ da sera y domegna: David y Jan
<i>i recordun:</i>	Emilia Kastlunger + 17.09.2015



Al ven cherí na biescia jüda a perde ... aria da festa! (Lc 15, 1-32)

I ponsi do

Gejú dá por pröm l'ejempio y va a cherí la biescia pordüda: al sta y baia con i picia dús, y endespra les critiches de chi co arata da ester tal dert. Sö al ci vegnel fat tresfora festa deache söla tera n'él entres endô de chi co é jüs por la strada falada co ven endô zoruch a por jí söla strada dal Vangelo de Gejú.

I preii ensciö

Al se sa bel da fá festa cassö n paraisc, catö, Gejú? I speri de sciö! Cösc ô dí che al é vignedé zacai co se convertesc y i dá l'ocajiu ai angeli y ai sanc da cianté, soné, magari balé y fá na viva por n amí gnü zoruch. Mo, dímo, ci fajeise pa canche al sozed le contrar? Canche al n'é de chi co lascia la fede y fej aziuns nia degnes de n cristian y de na porsona? Ah, poa ... al n'é sce de chi co se rüna la festa. I speri ch'i ne sunse mai en tal, ince sc'i sa che tö as belo fat döt por chi, mefo, por nos. I sun düc lapró pa chel tlap co sciampa. Visse do, Gejú, ví a se chirí! I sán che tö conescs avisa les semenes ch'i tolu por s'an jí dalunc da te ... al é entres endô les medemes, y gnanca da trepa fantasia. Porchel: i t'aspetun!



Enformaziun dla diozeja Balsan-Porsenu (www.bz-bx.net)

Personal: Ernennungen zum 1. September 2019

Mag. Klaus Sottsas zum Pfarrer von St. Vigil und zum Pfarrseelsorger von Enneberg, St. Martin in Thurn und Campill.

Heinrich Perathoner, entpflichtet als Pfarrer von St. Vigil und Enneberg, ernannt zum Seelsorger in St. Vigil, Enneberg, St. Martin in Thurn und Campill.




Vita de ploania y de paisc

Signor Klaus bengnù a La Pli!



Nüsc cörs é emplís de ligreza deache i án endô en ploan. Nosta ligreza orunse desmostré con la festa da encö, ara é en segn de rengraziamont a Chelbeldio ch'al s'é scinché Os. I Se periun ch'i se daideise jí le tru dla fede tal tomp dal dedancö y ch'i se daideise porté nüsc fistidi da vigne de. I s'aodun trepa ligreza, forza y sanité y ch'i podunse partí trec momonc emplís de fede y contenteza a lalt dal Signur.



Signur, confermeia söa empormetüda d'amur önn por l'ater.

La ploania i fej les miús aodanzes de benedisciun y fortuna ai nüc **Tobias Peslalz y Doris Brandlechner** co se dá adöm tal sacramont dal matrimone en sabeda ai 21 de setember ia Sorafurcia.